



SALOMATLIK – TUMAN BOYLIK

ЗДОРОВЬЕ НАРОДА — БОГАТСТВО СТРАНЫ

PEDIATR

№ 7-8 (922-923)
9-aprel, juma
2021-yilTOSHKENT PEDIATRIYA TIBBIYOT INSTITUTI MEHNAT JAMOASI NASHRI
ОРГАН ТРУДОВОГО КОЛЛЕКТИВА ТАШКЕНТСКОГО
ПЕДИАТРИЧЕСКОГО МЕДИЦИНСКОГО ИНСТИТУТАGazeta 1974-yil
martdan chiqqan
boshlagan

TA'LIM VA TARBIYA QUDRATI

B. T. DAMINOV,
ToshPTI rektori,
Xalq deputatlari Toshkent
shahar kengashi deputati

“Kuch – adolatda”, - deb ta'kidlagan edi buyuk sarkarda Amir Temur. Darhaqiqat, kuragi yer ko'rmagan sarkarda, yirik davlat arbobi, qonunshunos, iste'dodli me'mor, notiq, kerak joyida ruhshunos, shu bilan birga, el-yurtining har jabhadagi – ma'rifat, ta'limdagi otasi edi. Zero, rahbar adl bo'lsagina davlat obod bo'ladi, yoshlari salohiyatli bo'lib yetishadi.

Yoshlarga to'g'ri ta'lim-tarbiya berish o'z navbatida davlatni boshqarish bilan teng turadi. Negaki, davlat va yoshlar endigina tetapoya bo'lgan boladay gap. Amir Temur saltanat boshqarishda to'rt narsaga amal qilgan: 1) kengash; 2) mashvarat-u maslahat; 3) qat'iy qaror: tadbirkorlik va hushyorlik; 4) ehtiyotkorlikdir. Chunki kengash va mashvaratsiz saltanatning barcha qilgan ishlari va aytilgan gaplari noto'g'ri bo'lgan johil odamga qiyos qilish mumkin va o'z o'rnida uning aytgan so'zlari va qilgan amallari boshqa odam va xalqqa nadomat keltirgay. Demakki, ta'lim va tarbiyada ham kengash va mashvarat bo'lmog'i darkor. Qat'iy qaror va ehtiyotkorlik bu – har bir davlat va mamlakatning boshqarish aso-

si sirasiga kiradi. Bundan ma'lumki, ta'lim-tarbiyada ota-ona va ustozlar ehtiyot bo'lmog'i darkor. Bugun yoshlarning ongidagi bo'shliqni o'zining aqidalari bilan to'ldirib, buzg'unchi g'oyalarni tatbiq etayotgan aqidaparastlar uchrab turibdi. Yosh avlod ta'lim-tarbiyasida bugungi kunda bo'shliq qolishining oldini olish uchun yurtboshimiz tomonidan barcha shart-sharoitlar yaratib berilmoqda. Yurtimizda keng targ'ib qilinayotgan besh tashabbusni bunga misol tariqasida keltira olamiz. Kitobxonlikka alohida qaratilayotgan e'tibor o'z samarasini berib kelmoqda. Bugun kitobxon avtomobil sohibiga aylanish imkonini qo'lga kiritadi. Bundan ko'zlangan maqsad esa yoshlarni rag'batlantirish va kitobxonlikni keng tatbiq qilishdir.

Amir Temurning “Temur tuzuklari” nomli bitiklarida bir qancha davlat boshqaruviga oid hikmat va yo'nalishlar keltirilgan: “Ishbilarmon mardlik va shijoat sohibi, azmi qat'iy, tadbirkor va hushyor bir kishining ming-minglab tadbirsiz, loqayd kishilardan yaxshidir”. Darhaqiqat, bugungi kunda loqaydlikka yuz tutilsa, oila bilan birga jamiyatning ham xavfsizligiga putur yetadi. Demak, bitta farzand tarbiyasi butun jamiyatning mas'uliyatiga yuklangan buyuk vazifadir. Yoshlarning bilim olishdagi mashaqqatini hamda ularni qi-

ynab kelayotgan muammolariga yechim topishni jamiyat bartaraf etadi. Agar jamiyat loqaydlikka yuz bursa, yoshlar ta'lim-tarbiyasida bo'shliq boshlanadi va bevosita ularning ongida ham loqaydlik programmasi shakllanadi. Bunday minglab yoshlardan bitta mard va tadbirkor, ishbilarmon hamda bilimga chanqoq farzand durustdir. Chunki ular jamiyatni boshqara oladi, o'z oilasini asray oladi. Bugun hech bir rahbarning loqayd bo'lishga haqqi yo'q. “Qush uyasida ko'rganini qiladi”, - degan xalq orasidagi naqlda ham katta ma'no bor. Rahbar davlat boshqarishda, ustoz va ota-ona ta'lim-tarbiyada adl bo'lishi kerak. Mana shundagina biz bugungi globallashuv asri yoshlari hisoblangan farzanlarimizga adolatli kuch bo'lgan ne'mat – to'g'ri tarbiyani bera olamiz. Demak, siz-u bizning yelkamizda katta mas'uliyat bor!

Bugun yoshlarimiz erishayotgan yutuqlar beqiyos. Ularning jahon arenalarida erishayotgan g'alabalari – sport, madaniyat, adabiyot, ijtimoiy-siyosiy soha – barchasining negizida yuqoridagi ta'kidlangan adolatli kuch – ta'lim va tarbiya yotadi. Biz tarbiyani yoshlarimizga to'g'ri qo'llay olsak, buyuk sarkarda Amir Temur tuzgan saltanatdan poydevori mustahkam kelajakni qura olamiz.

Buyuk sarkarda va adolatli shoh

“Yuz ming otliq askar qila olmagani ishini bir to‘g‘ri tadbirkor kishi tadbir bilan amalga oshirishi mumkin”, - deya buyuk sarkarda Amir Temur “Temur tuzuklari” nomli hikmatlarida keltirib o‘tgan. Darhaqiqat, hamon barcha rahbar va yoshlarga ibrat bo‘lib kelayotgan ushbu asarda tom ma‘nodagi tarbiya vositasidir. Zero, Sohibqiron Temur hayot yo‘lidagi sinalgan uslub va haqiqatlarni keltirib o‘tgan. Bu o‘z o‘rnida barcha zamonning ibrat maktabidir.

Kuni kecha oliygohimizda Sohibqiron Amir Temur tavalludiga bag‘ishlangan tadbir bo‘lib o‘tdi. Tadbirga tashrif buyurgan mehmon – Adolat partiyasi Yunusobod tumani kengashi raisi A.Nosirov hamda oliygohning Yoshlar bilan ishlash bo‘yicha prorektori M.Ahmedova, Yoshlar bilan ishlash, ma‘naviyat va ma‘rifat bo‘limi boshlig‘i A.Xudayberdiyev, 2-pediatriya Yoshlar bilan ishlash bo‘yicha dekan o‘rinbosari M.Alimova, Yoshlar bilan ishlash, ma‘naviyat-ma‘rifat ishlari bo‘limi uslubchilari J.Jo‘raqulov, N.Nurmetova hamda oliygoh talabalari ishtirok etishdi.

Yoshlar bilan ishlash bo‘yicha prorektor M.Ahmedova: “Buyuk Sohibqironning vatanimiz rivoji hamda jahon sivilizatsiyasiga qo‘shgan hisssasi beqiyosdir. Xalqimiz, jumladan siz yoshlar Buyuk ajdodimizning hayoti, xalqimizning ozodligi, markazlashgan davlatchilikni mustahkamlashda qo‘shgan hissasini bilish, anglash va uning o‘gitlariga



amal qilish burchimiz ekanligini yoddan chiqarmasligingiz g‘oyat muhim sanaladi”, - deya ta‘kidlab o‘tdi.

O‘zbekiston o‘zining davlat mustaqilligiga erishgach, uning bir necha ming yillik ijtimoiy-siyosiy tarixini har taraflama o‘rganish uchun keng imkoniyatlar yaratildi. Ayniqsa, markazlashgan Amir Temur saltanati, uning o‘zbek davlatchiligi va madaniyatini rivojlantirishdagi o‘rni masalalariga oydinlik kiritilib, tarixchi, sharqshunos olimlarimiz ko‘plab birinchi manbaa ahamiyatidagi asarlarni o‘zbek tiliga tarjima qilib, nashr ettirdilar. Davlatimizning siyosati va xalqimiz xohish-irodasiga asoslangan Vazirlar Mahkamasi-ni 1994-yil 29-dekabrda “Amir Temur tavalludining 660 yilligini nishonlash to‘g‘risida”gi qarori, 1995-yil 26-dekabrda esa Prezidentimizning 1996-yilni “Amir Temur yili deb e‘lon qilish to‘g‘risida”gi farmonlari qabul qilindi. 1996-yil martida “Temuriylar tarixi” davlat muzeyini tashkil qilish xususida, “Amir Temur” ordenini ta‘sis etish to‘g‘risida farmonlar chiqdi. Amir Temur o‘zi yashab turgan jamiyatni eng yetuk ijtimoiy tizimga aylantirish, farovon hayot qurish maqsadidagina kurashib qolmay, balki bu g‘oyalarning butun dunyoda tantana qilishiga ham ishongan edi. Faqat shu maqsaddagina u harbiylik libosini kiygan edi. U ana shunday maqsadlarda jahongirlik qilgan har bir davlat boshlig‘i, asosan, to‘rt narsani xotirasida saqlash kerakligini uqtiradi: birinchidan, qaysi mamlakatni zabt etmoqchi bo‘lsa, to‘g‘ri tadbir va kengash bilan ish tutish; ikkinchidan, xatoga yo‘l qo‘ymaslik uchun har bir ishni ko‘p o‘ylab, sergaklik va ehtiyotkorlik bilan qilish; uchinchidan, o‘z atrofida aslzoda er yigitlarni (amirlarni) to‘plash va birlashtirish; to‘rtinchisi, bugungi kunning ishini



ertaga qoldirmaslik. Amir Temur dasturi va siyosiy-huquqiy qarashlarida mukammal jamiyatni orzu qilishdan ko‘ra, ko‘proq uni amalga oshirish hamda uning mas‘uliyatini o‘z zimmasiga olish yaqqol sezilib turadi. Shuning uchun ham Amir Temurning davlat arbobi, sarkarda va mutaffakir sifatidagi o‘ziga xosligi shundaki, u o‘zi hukmronlik qilgan saltanat (imperiya) timsolida mukammal jamiyatni qurdi va uni har tomonlama mustahkamlashga harakat qildi. Amir Temur ulusi – davlati, saltanati markazlashgan musulmon davlati sifatida tashkil topdi. Bunday davlatning tashkil topishida xalq ham, din ahllari ham Temurni qo‘llab-quvvatladilar. Zero, millat o‘z otasiga ergashadi. Demak, rahbar adolatli va har sohada ilg‘or bo‘lmog‘i lozim.

Tadbir davomida Amir Temur maqbarasi nomli film namoyish etildi. Amir Temur hayoti va faoliyati, uning buyuk sarkarda va davlat arbobi sifatida O‘rta Osiyo tarixi va jahon tarixidagi o‘rni roli beqiyosligi ushbu film barcha tadbir ishtirokchilariga birdek manzur bo‘ldi. Darhaqiqat, Sohibqiron Temur avlodlari, albatta, jahon minbarlarida o‘zbek bayrog‘ini ko‘kka ko‘targan haqiqiy salohiyat egalari bo‘lib yetishishiga ishonamiz.

Xasanxo‘ja ABIDOV
ToshPTI rektorining yoshlar masalalari bo‘yicha maslahatchisi – institut Yoshlar ittifoqi boshlang‘ich tashkiloti yoshlar yetakchisi,
O‘zbekiston Respublikasi Oliy Majlis Qonunchilik palatasi huzuridagi Yoshlar Parlamenti a‘zosi

Ma'rifatli yoshlar kitob o'qiydi



Uchinchi Renessansning asosi hisoblangan beshta ustuvor tashabbusda kitobxonlik alohida o'rin olgan. Bugun yurtboshimiz Shavkat Mirziyoyev ta'kidlaganlaridek: "Kitob o'qigan bola avtomobil sohibi bo'lishga loyiq". Darhaqiqat, bugungi ilmga chanqoq yoshlar orasidan kitob mutolaa qilib, avtomobil sohibi bo'layotgan yoshlar anchagina. Haqiqiy kitobxon uchun kitob mutolaasidan yagona maqsad – ma'naviy va ma'rifiy ilm egallab, komillikka erishishdir. Zero, bugun yoshlarga qaratilayotgan har bir e'tibor asosida ham mana shu ulug'vor g'oyalar turadi.

10-aprel kuni oliyogohimizda "Adabiyot va ma'naviyat oyligi" nomli kitobxonlikni keng targ'ib qilishga asoslangan tadbir tashkil qilindi. Ushbu tadbirda 2-Pediatriya Yoshlar bilan ishlash bo'yicha dekan o'rinbosari M. Alimova, Axborot-resurs markazi xodimi D. Rasulova, Yoshlar bilan ishlash ma'naviyat-ma'rifat ishlari bo'limi uslubchilari J. Jo'raqulov, N. Nurmetova hamda oliyogohimizning a'lochi va kitobsevar 84 nafar talabalari ishtirok etishdi. 2-Pediatriya Yoshlar bilan ishlash bo'yicha dekan o'rinbosari M. Alimova tadbir boshida: "Aholi, avvalo, yoshlarning ma'naviy-ma'rifiy, badiiy-estetik talablariga javob beradigan kitoblarni yuksak sifat bilan chop etish, nashriyotlar va ijodkorlar faoliyatiga ko'maklashish, bolalarga mo'ljallangan adabiyotlarni chop etishni qo'llab-quvvatlash, milliy va jahon adabiyotining eng sara namunalarini tarjima qilish, mutolaa madaniyatini yuksaltirish, respublikaning olis hududlarida va yoshga doir kitobxonlik madaniyatini rivojlantirish, kitob savdosini tashkil

etish tartiblarini soddalashtirish, yangi nashr etilgan kitoblarni yetkazish va axborot manbalarini tarqatish tizimini takomillashtirish, kitob yetkazib beruvchilarni zamonaviy ijtimoiy ehtiyojlarga moslashtirish, infratuzilmani yaxshilash, axborot-kutubxona markazlarini chop etiladigan bosma nashrlar va ularning elektron nusxalari bilan to'ldirib borish, elektron kitoblar yaratish, kitoblarni raqamlashtirish va elektron kataloglarni tuzish hamda tizimli ravishda yangilab borish, aholining kitobxonlik darajasi va kitobga qiziqishini tizimli o'rganib borish, kitobxonlik madaniyatini rivojlantirishga qaratilgan loyiha va tanlovlarni tashkil etish, kutubxonachi kadrlar salohiyatini oshirish hamda xorijiy asarlarga onlayn buyurtma berish, ularni respublika hududiga olib kelish va tarqatish tizimini hamda kitobxonlik madaniyatini rivojlantirish bo'yicha xalqaro hamkorlikni kengaytirish maqsadida Respublikamizda aprel oyining 1 haftasi "Kitobxonlik haftaligi" deb e'lon qilindi", - deya ta'kidlab o'tdilar. Darhaqiqat, kuni kecha davlatimiz rahbari boshchiligida qabul qilingan qarorlari (781-son, 14.12.2020 y.) bilan 2020-2025-yillarda kitobxonlik madaniyatini rivojlantirish va qo'llab-quvvatlash milliy dasturi tasdiqlandi. Bu

haqda Huquqiy axborot kanali xabar berdi:

"Aholi, avvalo, yoshlarning – Qarorga ko'ra, 2021-yildan boshlab har yili aprel oyining birinchi haftasi "Kitobxonlik haftaligi" etib belgilandi". Shuningdek, qaror bilan tasdiqlangan Dasturni 2020-2021-yillarda amalga oshirish bo'yicha "Yo'l xaritasi"ga ko'ra, nashriyotlar tomonidan yozuvchilarga ajratiladigan gonorar masalasini takomillashtirish yuzasidan normativ-huquqiy hujjat loyihasini ishlab chiqish nazarda tutilgan.

Institutning Axborot-resurs markazida uch mingdan ortiq fanga doir hamda badiiy-adabiy kitoblar mavjud bo'lib, ulardan talabalar foydalanishi uchun barcha sharoitlar yaratilgan. Bugungi kunda talabalarga qulaylik yaratish maqsadida elektron va audio kitoblar yaratilgan. Axborot-resurs markazi telegram kanali orqali talabalar uchun kerak bo'lgan kitoblar tashlab beriladi. Zero, yoshlar bizdan ko'ra ilmiy bo'lishlari kerak.

M.AHMEDOVA

Yoshlar bilan ishlash bo'yicha prorektor



G'alaba bog'iga tashrif

“Bu bog' xalqimizning G'alabaga qo'shgan hissasini aks ettirishi, otalarimiz va bobolarimiz qahramonligini abadiylashtirishi kerak”, - deya ta'kidlagan edilar davlatimiz rahbari Shavkat Mirziyoyev Ikkinchi jahon urushidagi G'alabaning 75 yilligi munosabati bilan Toshkent shahrida G'alaba bog'i va muzeyini barpo etish bo'yicha tashabbuslarida. Darhaqiqat, bugungi kunda ushbu barpo etilgan bog' nihoyatda ko'rkam, yurtboshimiz ta'kidlaganlaridek, ota-bobolarimiz ruhiga bag'ishlangan beqiyos xotira timsoli bo'ldi. Chunki har bir eksponat va bog'dagi haykallar tasviri misli jonlidek, har bir tomoshabinga katta taassurot uyg'otadi. Bog'da 1941–1945-yillardan harbiy texnika va qurol-aslahalar, okoplar va blindajlar kompozitsiyalari va turli xil installatsiyalar o'rnatilgan, muzey qurilgan. Bu bog' har bir yosh avlodga mana shu yurtimizdagi tinchlik ortidagi qancha shahid va qahramonlar mehnati va umri borligini hamda tinchlik qadrini anglashlari uchun katta maktab bo'la oldi va bugun yurtimizdagi katta madaniyat maskanlaridan biriga aylanib ulgurdi.

Toshkent Pediatriya tibbiyot instituti Klinik farmakologiya kafedrasi xodimlari talabalar bilan birgalikda Toshkentda ochilgan G'alaba bog'i va muzeyiga tashrif buyurishdi. Bog'ning hashamati, har bir eksponatlarning rejali joylashganligi, chiroyli bezatilganligi ko'zni quvontiradi. Ulug' Vatan



urushi davrida qo'llanilgan harbiy texnika namunalarini jonli ko'rish yanada taassurotlarimizni yorqinroq bo'lishiga sabab bo'ldi. G'alaba bog'i va muzeyini ko'rishga kelganlar orasida yoshlar ham, keksalar ham bor, O'zbekistonning turli viloyatlaridan ham mehmonlar ziyoratga kelishgan. Ular bilan bir qatorda G'alaba bog'ining to'rida joylashgan muzeyga kirdik. Kira-verishdagi katta pannoda O'zbekiston xalqining Revolyutsiyagacha davri, 1941-1945-yillardagi Ulug' Vatan urushi davrida o'zbek xalqining shijoati va mehnati, “41 yil olmalari” filmidan ham bir ko'rinish, urush vaqtida ota-onasiz qolgan bolalarni oddiy o'zbek xalqi bag'riga olganligini ko'rinib turibdi.

O'sha davrlarda Ona Vatanimizdagi har bir oila o'z farzandlari qatorida frontga yordam berish uchun zavodlarda qurol-aslaha tayyorlab yordam bergan bo'lsa, dalalarda mehnatkashlar nafaqat O'zbekiston uchun, balki, sobiq SSSR xalqi uchun ham xizmat qildi. Bular hammasi hujjatli filmlarda ko'rsatilgan. Shu yerda

yana 2-jahon urushida qatnashgan o'zbek shifokorlarini ham video-filmlari mavjud. Bugun ularning xotirasini yod etish har birimizning burchimiz.

G'alaba bog'i va muzeyi us-toz-murabbiylar hamda talabalarda kuchli taassurot qoldirdi. Nafaqat, tinchlik asoschilari sifatida, balki, kelajakning poydevorlari sifatida ham Jahon urushi qatnashchilari va front ortidan xizmat qilgan barcha qahramonlarimizning nomlariga ehtirom tuyg'usi yanada yuksaldi. Bu kabi yurtimizda oshirilayotgan tinchlik qadri va bobolar yodini abadiylashtirish kabi islohotlar davlatimiz rahbari tomonidan yurtimizda keng miqyosda amalda o'z aksini topmoqda. Bizning vazifamiz esa kelajak avlodga bundanda poydevori mustahkam, adolatdan bapro bo'lgan Vatanni yetkazishdir.

**Sh. QASIMOVA,
G.XAQBERDIYEVA,
R.AZIZOVA**
*Klinik farmakologiya
kafedrasi xodimlari*



ADIB VA IJOD



“Abdulla Qodiriy... qalbi butun, o‘ziga xos shaxs, tug‘ma epik yozuvchi, keng ko‘lamdagi master, yuksak ma‘nodagi realist san‘atkoridir”, - deya e‘tirof etgan edi buyuk o‘zbek adibi Oybek. Darhaqiqat, Abdulla Qodiriy tug‘ma ijodkor va qalb san‘atkoridir. Adib o‘zbek romanchiligining tamal toshini qo‘ygan ijodkor sifatida mana necha yillarki, xalq millat yuragida abadiy yashaydi. Institutimizning O‘zbek, rus va lotin tillari kafedrasida tomonidan ma‘naviy-ma‘rifiy ishlari bo‘yicha o‘tkazilgan O‘zbekiston xalq yozuvchisi Abdulla Qodiriy hayot va ijodiga bag‘ishlangan davra suhbatlari bo‘lib o‘tdi. Ushbu davra suhbatida O‘zbek, rus va lotin tillari kafedrasida mudiri, filologiya fanlari nomzodi, taniqli

shoira K.Turdiyeva, o‘quv ishlari bo‘yicha mas‘ul R. Berezovskaya, ilmiy ishlar bo‘yicha mas‘ul N.Mexmonova, kafedraning katta o‘qituvchilari – M.Mahkamov, Z.Sodiqova, filologiya fanlari nomzodlari G.Quramboyeva, G.Axmedova hamda institutimiz o‘qituvchilari – Z.Rasulova, F.Akbarxo‘jayeva va “Davolash ishi” yo‘nalishi birinchi bosqich talabalari ishtirok etishdi. Alisher Navoiy nomidagi Respublika Davlat mukofoti laureati, “Mustaqillik” ordeni sovrindori Abdulla Qodiriyning “Jinlar bazmi” hikoyasi asosida O‘zbekiston Davlat drama teatri aktyorlari tomonidan sahnalashtirilgan sahna ko‘rinishi barcha ishtirokchilarga manzur bo‘ldi. Bu sahna ko‘rinishida A.Qodiriyning ayancli hayo-

ti, o‘z xalqining madaniy saviyasini oshirish uchun qilgan harakatlari, shu yo‘lda boshiga tushgan qiyinchiliklari, nohaqliklar, do‘stlarning sotqinliklari, yaqinlarining tortgan azob-uqubatlari taniqli aktyorlar tomonidan juda hayotiy tarzda ijro etildi. Bu sahna ko‘rinishi, avvalo, millatni uyg‘onishga chorlaydi. Zero, adib va ijod ruhi chambarchas bog‘lan-sagina, adolatni mangu yoza oladi. Bugun adib va uning ijodi nafaqat yurtimizda, balki barcha dunyo xalqlarida ham e‘tirof etilmoqda. Chunki Qodiriy – adib va ijod ruhi birga tug‘ilgan ijodkor edi.

M.HAMRAQULOVA
O‘zbek tili va adabiyoti kafedrasida ma‘naviy-ma‘rifiy ishlar bo‘yicha mas‘ul

Teatr – hayot ko‘zguisi

San‘at – insonning nozik kechinmalarini, oltinchi hissiyatini shakllantiradigan keng ma‘nodagi inson ma‘naviy olamini boyitib boradigan xalq madaniyatining bir ko‘rinishidir. Zero, har bir san‘at va madaniyat – bizning hayotimizning bir parchadir. Bu borada teatr katta ahamiyatga ega. Chunki, har bir tuyg‘ularning inson ko‘zi o‘ngida jonli ijroda namoyishlari, hissiyotlarni ishonarli tarzda ifoda etishlarida aktyorlardan katta mahorat talab qilinadi. Demak, teatr – hayot nafasi bilan chambarchas bo‘lgan yagona san‘at turi. Negaki, teatr – hayot haqiqatining bir bo‘lagi.

Hayotimizni kundan kunga yaxshilanayotganligini ko‘rib quvonamiz, ammo shu oxirgi 2019-yildan ancha og‘irlashib qoldi. Bu butun dunyo boshiga kelgan COVID-19 ofati bo‘lib, pandemiya natijasida nafaqat bizda, Yer kurrasidagi barcha mamlakatlar ham ko‘p aziyat chekdi. Fidoyi shifokorlarimizning sa‘y-harakatlari tufayli ko‘pchilik bemorlarga yengillik berilib, sog‘ayib chiqishdi. Sog‘liqni saqlash vazirlar mahkamasi tomonidan ishlab chiqilgan COVID-19 infeksiyasini davolash va rehabilitatsiyasi uchun tushirilgan qo‘llanmalar shifokorlarimizga yaqindan yordam berdi. Shuning uchun ham O‘zbekiston Respublikasida boshqa davlatlarga nisbatan kasallik nisbatan kam bo‘lishi bilan birga, karantin muddatlari ham qisqartirildi. Bu esa



xalqimizning faravon hayot tarzini yanada yuksaltirdi.

Yangi o‘quv yiliga ancha yengillik tug‘ilib, institutimiz tomonidan ham talabalarimizni ma‘naviy-ma‘rifiy hayotlarini yanada takomillashtirish maqsadida Muqimiy va satira teatrlariga taklifnoma berildi. Har bir kafedradagi ustoz-murabbiylar guruhlar bilan birga Muqimiy teatri ga borishdi. Muqimiy teatri Toshkent shahrida sobiq ittifoq davridan barpo etilib, hali zamon o‘z faoliyatlarini muntazam yangilab olib borishadi. Oliygohimizning Klinik farmakologiya kafedrasida bilan Umumiy xirurgiya kafedra xodimlari yonma-yon bo‘lib qolganligimiz tufayli, ular bilan birga

Muqimiy teatri ga “Tohir va Zuhra” – spektaklini yangi talqinidagi sahna ko‘rinishi namoyishidan bahramand bo‘ldik. Klinik farmakologiya kafedrasida ustoz murabbiysidan N.

Malyanova va Umumiy xirurgiya kafedrasidan M.Agzamova o‘z talabalarini bilan birgalikdagi tashrif buyurishdi.

Sahnadagi lavhalar hozirgi hayotimizga moslab, juda qiziqarli qilib tayyorlanganligi, zamon talabiga javobi bilan bir qatorda, o‘z madaniyatimizni ulug‘lab ko‘rsatilgan. Zaldan bironta ham inson to tamom bo‘lmaguncha o‘rnidan turib ketmay tomosha qilishdi. Biz o‘ylaymizki, turib ketmaslik, aktyorlarning mehnatiga olqishlar bo‘lib, teatr xodimlari uchun yuksak bahodir.

Bu kabi sahna ko‘rinishlarida milliy ruh va oddiylik borligi uchun barcha tomoshabinlar olqishlashadi. Chunki teatrda inson ruhan asar qahramonlari bilan birga bo‘ladi. Ularning dard va muhabbatlari bilan bir lahzaga sherik bo‘lib, ma‘naviy va madaniy olamini boyitib boradi. Teatrni haqiqiy ma‘nodagi hayot ko‘zguisi deya olamiz. Zero, teatr ham hayotimizning bir parchasidir.

M. AGZAMOVA

Ummiy xirurgiya rafedrasida, dotsenti

R. AZIZOVA

Klinik farmakologiya kafedrasida ustoz-murabbiysi





Men – Dehqonov Toxir 2001-yil 25-noyabr sanasida Toshkent viloyati Parkent tumani G‘o‘rtepa (hozirgi nomi Obod) qishlog‘ida tug‘ilganman. Piskent tumandagi 31-UO‘T maktabida o‘qiganman. So‘ng Olmaliq shahridagi litseyda tahsil oldim. 2019-yil

ToshPTI da grant asosida o‘qishga qabul qilindim. Hozir 2-bosqich talabasiman.

Dadam kitobxon inson bo‘lgan. Badiiy kitoblarni ko‘p o‘qiganlar. Shu sabab menda ham adabiyotga qiziqish uyg‘ongan. Muhammad Yusuf va Usmon Nosirning she‘rlari menga juda ham yoqadi. Ularning ijodi va hayoti bilan tanishib chiqqach menda she‘riyatga qiziqish kuchaydi. Keyinchalik she‘r yozish istagi tug‘ildi. Dastlabki yozgan she‘rlarim ustozimga atalgan she‘rlar bo‘lgan. Maktab davrida yozgan she‘rlarimni sinfdoshlar va oila a‘zolarimdan boshqa insonlarga ko‘rsatmaganman. She‘riyatga qiziqsam ham jiddiy qaramaganim uchun she‘rlarimni to‘plamasdim. Oliygo‘hda 2-kursga she‘rlarimni to‘plashni boshladim. She‘rlarimda bolalik xotiralarim va ichki kechinmalarimni sodda tilda yoritib berishga harakat qilaman.

Ona qishlog‘im

*Kichik qir yonida kichik bir qishloq
Mexr-u muhabbat g‘arq pishgan bog‘im
Insoniy tuyg‘ular qaynagan buloq
Mening qalbidasan ona qishlog‘im
Bolaligim o‘tgan toshloq ko‘chalar
Ko‘zimga yosh kelar eslagan chog‘im
Buvim ertak aytgan oydin kechalar
Mening qalbidasan ona qishlog‘im
Esimda ko‘changda yurgan kezlarim
To‘p o‘ynab timnasdim, yalang oyog‘im
Quvonchdan porlardi doim ko‘zlarim
Mening qalbidasan ona qishlog‘im
O‘tgan hayotimga guvohsan o‘zing
Ilk bosgan izlarim tushgan tuprog‘im
Meni ulg‘aytirgan qish, bahor, yozing
Mening qalbidasan ona qishlog‘im
Men uchun azizdir sening tuprog‘ing
Va unda ko‘kargan har bitta giyoh
Sevganimning ismin o‘yib yozganman
O‘sha daraxtlar ilk sevgimga guvoh
Odamlaring sodda, mehribon, sofdil
Hammasi uy-joyim, bolam deb yashar
Do‘stlarim davrasin qumsaydi ko‘ngil
Borolmay dilimda dardlarim oshar
Sog‘inaman seni rasmingga boqib
Borolmayman buni xoxlamay harchand
Ollohim nasib qilsa izlanib o‘qib
Bo‘laman sen uchun munosib farzand
Shifokor bo‘lmoqlik men uchun maqsad
INSHAALLOH maqsadga albat yetaman.
Bir kuni bag‘ringga qaytaman xursand
Va sening tuprog‘ing bo‘lib ketaman.*

O‘zbekiston Respublikasi Sog‘liqni saqlash vazirligi TOSHKENT PEDIATRIYA TIBBIYOT INSTITUTI

Professor-o‘qituvchilar tarkibi bo‘yicha quyidagi kafedralar lavozimlariga TANLOV e‘lon qiladi:


KAFEDRA MUDIRI: Fakultet pediatriya.

DOTSENTLAR: Asab kasalliklari va bolalar asab kasalliklari. Akusherlik va ginekologiya, bolalar akusherligi va ginekologiyasi; Oftalmologiya, bolalar oftalmologiyasi.

ASSISTENTLAR: Anatomiya; Otorinolaringologiya, bolalar otorinolaringologiyasi; Bolalar stomatologiya; Xirurgik kasalliklari; Bolalar yuqumli kasalliklari; Fakultet ichki kasalliklari, XDT, kasb kasalliklari, gospital ichki kasalliklari, ichki kasalliklari propedevtikasi; Endokrinologiya; Shoshilinch pediatriya, halokat tibbiyoti; Patologik anatomiya; Gistologiya; Asab kasalliklari va bolalar asab kasalliklari; Epidemiologiya, yuqumli kasalliklar.

Tanlov muddati – e‘lon chiqqan kundan 1-oy. Manzilgoh Bog‘ishamol ko‘chasi 223, Tosh PTI.

Avtobuslar: 115, 19 ToshPTI bekati. 09.04.2021.

 <p>PEDIATR</p> <p>TOSHKENT PEDIATRIYA TIBBIYOT INSTITUTI MEHNT JAMOASI NASHRI ОРГАН ТРУДОВОГО КОЛЛЕКТИВА ТАШКЕНТСКОГО ПЕДИАТРИЧЕСКОГО МЕДИЦИНСКОГО ИНСИТУТА</p>	<p>Tahrir kengashi: D.A. Asadov, A.V. Alimov, X.F. Haydarov, M. Ahmedova, K.N. Haitov, S.S. Gulyamov, D.T. Ashurova, A. Rahmatullayev, S. Nurxodjayev A. Valiyev, A.A. Kudayberganov, Nashr uchun mas‘ul: R. G‘o‘chchiyeva</p>	<p>Bosh muharrir: B.T. DAMINOV Tahrir hay‘ati: (ishchi guruh) E.O. Tursunov, K.Sh. Turdiyeva (Bosh muharrir o‘rinbosari), A.M. Mannonov, D.A. Ahmedova, H. Rasulov S.A. Begmonov, A. Nosirov, Z. Karimova, A. Xudayberdiyev</p>	<p>Gazeta Toshkent shahar matbuot va axborot boshqarmasida 29.12.2006-yil 02-0010-son bilan ro‘yxatga olingan.</p> <p>Manzil: 700140, Toshkent-140, Bog‘ishamol ko‘chasi, 223</p> <p>Gazeta institut hisobidan nashr etiladi va bepul tarqatiladi.</p>
------------------------------------------------------------------------------------------------------------------------------------------------------------------------------------------------------------------------------------------------------------------------------------	------------------------------------------------------------------------------------------------------------------------------------------------------------------------------------------------------------------------------------------------------------------------------	-----------------------------------------------------------------------------------------------------------------------------------------------------------------------------------------------------------------------------------------------------------------------------------	------------------------------------------------------------------------------------------------------------------------------------------------------------------------------------------------------------------------------------------------------------------------